

**MESYUARAT KETIGA, PENGGAL KEEMPAT,
PARLIMEN KETIGA BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : BUKAN JAWAB LISAN

**DARIPADA : TUAN IGNATIUS DORELL
LEIKING [PENAMPANG]**

NO. SOALAN : 517

Minta **MENTERI KEMAJUAN LUAR BANDAR DAN WILAYAH** menyatakan berapakah rumah PPRT yang telah dibina di Penampang dan kenapa kah proses untuk mendapat rumah PPRT ini agak sukar.

JAWAPAN:

Tuan Yang Di-Pertua,

Sepanjang tahun 2011 sehingga 2016, Kementerian Kemajuan Luar Bandar dan Wilayah (KKLW) telah membina dan membaik pulih sebanyak 431 unit rumah di bawah Program Pembangunan Rakyat Termiskin (PPRT) iaitu 268 unit bina baru dan 163 unit baik pulih di Daerah Penampang dengan nilai keseluruhan projek berjumlah RM14.456 juta.

Untuk makluman Yang Berhormat jua, permohonan PPRT perlu memenuhi syarat-syarat tertentu iaitu antaranya:

- i) Peserta hendaklah disahkan miskin tegar atau miskin serta berdaftar dalam sistem e-Kasih;
- ii) Peserta hendaklah diperaku dan disahkan layak oleh *Focus Group* Pembasmian Kemiskinan Daerah;
- iii) Peserta tidak mempunyai rumah ataupun rumah sedia ada telah usang, daif atau tidak selamat untuk diduduki; dan

- iv) Peserta hendaklah memiliki tanah sendiri atau mendapat kebenaran daripada tuan tanah / Kerajaan.

Sehubungan itu, agensi pelaksana perlu mengambil kira syarat-syarat tersebut sebelum pelaksanaan PBR dimulakan. Ini adalah untuk memastikan bantuan PPRT sampai kepada golongan yang benar-benar layak.

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN

**DARIPADA : YANG BERHORMAT TUAN IGNATIUS
DORELL LEIKING [PENAMPANG]**

SOALAN :

YB Tuan Ignatius Dorell Leiking [Penampang] minta **PERDANA MENTERI** menyatakan jika sumber Dana Khas Ahli-Ahli Parlimen yang mewakili pihak Kerajaan datang daripada kutipan cukai rakyat dan jika betul, kenapakah Ahli-Ahli Parlimen Pembangkang tidak diberi peruntukan yang sama.

SULIT

JAWAPAN: YB DATO' SRI AZALINA BINTI DATO' OTHMAN SAID
MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, Kerajaan pada setiap tahun di bawah Peruntukan Khas YAB Perdana Menteri telah menyediakan sejumlah peruntukan untuk semua kawasan Parlimen di seluruh negara. Peruntukan yang disediakan ini adalah bagi pelaksanaan pelbagai program/projek kecil dan pembekalan yang merupakan *complement* dan *supplement* bagi projek-projek pembangunan di bawah Rancangan Malaysia Lima Tahun.

Sekian. Terima kasih.

SULIT

SOALAN: 519

PEMBERITAHUAN PERTANYAAN DEWAN RAKYAT

PERTANYAAN : BUKAN LISAN

**DARIPADA : YANG BERHORMAT DR. MICHAEL TEO YU
KENG [MIRI]**

SOALAN :

YB Dr. Michael Teo Yu Keng [Miri] minta **PERDANA MENTERI** menyatakan apakah perkembangan perundingan dengan Kerajaan negeri Sarawak mengenai penurunan kuasa kepada negeri Sarawak dan apakah yang telah dipersetujui untuk penurunan kuasa kepada negeri Sarawak oleh Kerajaan Persekutuan.

SULIT

JAWAPAN: YB DATO' SRI AZALINA BINTI DATO' OTHMAN SAID
MENTERI DI JABATAN PERDANA MENTERI

Tuan Yang di-Pertua,

Untuk maklumat Ahli Yang Berhormat, Yang Amat Berhormat Perdana Menteri semasa merasmikan pelancaran Bulan Kebangsaan dan Kempen Jalur Gemilang 2015 di Kuching pada bulan Ogos 2015 yang lalu telah mengumumkan untuk lebih banyak kuasa pentadbiran membabitkan jabatan dan agensi persekutuan bakal diserahkan kepada kerajaan Negeri Sabah dan Sarawak dalam usaha merangsangkan pembangunan di kedua-dua negeri ini. Seterusnya, perincian utama pemberian autonomi atau penurunan kuasa (*empowerment*) kepada kerajaan Negeri Sabah dan Sarawak tersebut telah diumumkan oleh Perdana Menteri pada 16 September 2015 yang melibatkan penurunan kuasa secara pentadbiran dan berperingkat kepada kerajaan Negeri Sabah dan Sarawak.

Pelaksanaan penurunan kuasa secara pentadbiran dan berperingkat tersebut adalah berdasarkan ketetapan-ketetapan yang diperuntukkan dalam Perlembagaan Persekutuan dan undang-undang Negara dan akan tertumpu kepada fungsi-fungsi operasi dan pentadbiran tanpa melibatkan pindaan kepada Perlembagaan Persekutuan atau mana-mana undang-undang Negara yang berkaitan, termasuklah perkara-perkara yang telah disenaraikan dalam Senarai Persekutuan, Negeri dan Bersama.

SULIT

Dalam hal ini, pemberian penurunan kuasa secara pentadbiran sedang diteliti dengan terperinci oleh Jawatankuasa Bersama Mengkaji *Empowerment* Secara Pentadbiran Kepada Kerajaan Negeri Sabah dan Sarawak. Jawatankuasa Bersama ini ditubuhkan oleh Kerajaan bagi mengkaji perkara yang boleh dan akan diberi penurunan kuasa secara pentadbiran kepada kerajaan Negeri Sabah dan Sarawak.

Selain pelaksanaan penurunan kuasa kepada kerajaan Negeri Sabah dan Sarawak tersebut, pada 11 Mei 2016 Jemaah Menteri telah bersetuju supaya pelaksanaan *devolution of authority* kepada kerajaan Negeri Sabah dan Sarawak dilaksanakan berpandukan kepada hak-hak serta kuasa autonomi yang diperuntukkan di bawah Perlembagaan Persekutuan kepada Negeri itu dan bersetuju bahawa Yang Berhormat Dato' Sri Anifah bin Aman, Menteri Luar Negeri dan Yang Berhormat Datuk Hajah Nancy binti Haji Shukri, Menteri di Jabatan Perdana Menteri bersama-sama dengan Jabatan Peguam Negara, meneliti semua hak serta kuasa autonomi yang diperuntukkan di bawah Perlembagaan Persekutuan kepada Sabah dan Sarawak termasuk dari segi peraturan-peraturan sedia ada dalam pelaksanaan *devolution of authority* kepada Sabah dan Sarawak

Susulan daripada keputusan Jemaah Menteri itu, suatu mesyuarat yang dipengerusikan secara bersama oleh Yang Berhormat Dato' Sri Anifah bin Aman, Menteri Luar Negeri dan YB Datuk Hajah Nancy binti Haji Shukri, Menteri di Jabatan Perdana Menteri telah diadakan pada 13 Jun 2016. Mesyuarat telah membincangkan mengenai pelaksanaan *devolution of authority* kepada kerajaan Negeri Sabah dan Sarawak dan telah membentuk Jawatankuasa Pemandu dan Jawatankuasa Teknikal untuk tujuan ini. Jawatankuasa Pemandu dan

SULIT

Jawatankuasa Teknikal yang ditubuhkan tersebut dianggotai oleh wakil kerajaan Negeri Sabah dan Sarawak dan wakil Kerajaan Persekutuan.

Proses pelaksanaan *devolution of authority* ini merupakan suatu proses yang berterusan (*ongoing*) dan rundingan dengan pihak-pihak yang berkenaan masih dijalankan. Memandangkan rundingan sedang giat dijalankan dan belum dimuktamadkan, butiran terperinci mengenai Mesyuarat yang telah diadakan belum boleh didedahkan kepada umum. (Semua penjalanan mesyuarat ini bertaraf Rahsia)

Kedua-dua proses penurunan kuasa dan *devolution of authority* yang sedang dilaksanakan ini membuktikan keseriusan dan komitmen Kerajaan Persekutuan dalam mencari langkah penyelesaian yang terbaik bagi isu yang telah dibangkitkan oleh kerajaan Negeri Sabah dan Sarawak. Ini menunjukkan bahawa ruang untuk menyuarakan apa-apa isu yang berbangkit sentiasa terbuka bagi rakyat Negeri Sabah dan Sarawak dan Kerajaan Persekutuan bersedia untuk mengadakan rundingan dan perbincangan demi kepentingan rakyat Negeri Sabah dan Sarawak secara amnya.

Sekian. Terima kasih.